

Uffem Rathenauplatz misst merr was mache

Omm letzde Sunndaach omm Stommdisch, so korz bevor merr hoomgehe wolde, hott de Karl e nei Thema oogefonge: Ihr Männer, losst uns emol vom Rathenauplatz redde. Uff dem siehsde gonz selten ooner steh und babbele, unn schunn garnit siehsde Leit uff dene Sondstowerfel geecheiwwer vom Kinnergadde sitze. Weil der Platz iss gonz frieher enn Kerchhof gewese unn der Platz iss heit noch doot.

Ich habbem Karl beigehalle: Midde innere Stadt wie Flerschem iss enn doote Platz, der iss noch dooter als de Rathenau. Awwer so enn doote Platz kann merr sich doch heitzedaach nimmi leisde. Der basst aach garnit zu de Champs Elysee von Flerschem, de nei Grawestrooß, uff dere, wennse ferdisch iss, die Leit unner Chinesische Beem flaniern kenne, noochdem se vom Oikaafe in Hochem odder Raunem zurick kumme sinn.

De Karl hott genickt. Also uffem Rathenauplatz misst merr wirklich was mache. Awwer was?

Doo issem Schorsch was oigefalle. Ich habb e Idee. Weil dorsch dess Demografische, von dem merr bald jeden Daach was in de Zeidung lese dut, werrds aach hier bei uns bald mehr Alde als Junge gewwe, unn desdeweche muss so e Stadt wie Flerschem mehr ferr die Alde mache. Die derf sich nit nor mette null bis dreijährische Kinner unn mette Juchendliche beschäfdische, naa, aach mette alde Leit von Sechzich bis Hunnert. Iwwerall heersde von de Polidiker, mir misse was ferr die Kinner mache, die sinn unser Zukunft. Ja moone die dann, mir Alde hädde koo Zukunft mehr? Ich saachs dene: Ei guckt eich doch emol um – vill von uns hawwe noch mehr Zukunft als monche von dene junge Leit, die in Fronkfort odder Meenz erumdorzelle. Deshalb saach ich: Wer die Alde long genuch links leie lässt, der derf sich nit wunnern, wenn die nooch emm Wachwerrn uffsteie, um sich beim La Fontaine ze treffe.

Dess hottem Karl gefalle. Awwer saacht emol, was kennt merr dann mett dem Platz mache?

Ich saach: Heert emol zu, ich habb gelese, dass in Spanien, in dene ihrne Hauptstadt Madrid, uff e paar von dene ihrne Plazas so Spillgeräte ferr Senioren uffgestellt worrn sinn. Unn weilse jetz aach in Hadderschem iwverleeche, dasses gut wär, so was ze mache, sollte mir in Flerschem doodemett nit warte. Unn jetz kimmt moi Idee: Dess wär doch was ferr de Rathenauplatz, der wär groß genuch ferr sowas. Doo misst merr nor uff de recht Seit zwaa von dene Beem fälle ...

De Karl hott sofort de Kopp geschittelt. Dess gieht nit, Honnes, dess gieht nit weeche dem Naturschutz, was glaabsde was dess gibt wenn merr die Beem fälle losse wollt.

Ich habb awwer grad weidergemacht. Guckse derr doch oo, die zwaa Beem, ess sinn doch gar koo Blätter mehr droo, wahrscheinlich sinn die Stämm schunn gonz wor-misch.

Doo grinst de Schorsch. Unn wenn merr die wirklich fälle dut, misst merr ooner defoo beim Abseeche so fälle losse, dass er grad uff den nichtsnutziche Brunne fällt, dann wär der aach fort. Weil dem soi Geplätscher hott noch koon oonziche Mensch zum Hiesetze gebrocht. Awwer egal wies iss, doo redde merr e onnermol weider, ich muss jetz hoom, sunnst kriehe ich Krach mettem Kättche.

Eiern Honnes